



Amcan Llesiant 1

Dechrau'n Dda - Helpu i roi'r dechrau gorau mewn bywyd i bob plentyn a gwella eu profiadau yn gynnar mewn bywyd

Yn 167, mae nifer y plant sy'n derbyn gofal yn parhau i fod ymhlith yr isaf yng Nghymru

Mae effaith COVID-19 wedi rhoi pwysau sylweddol ar deuluoedd, ac yn sgil hynny mae'r galw am ein gwasanaethau wedi cynyddu. Mae hyn ynghyd ag effeithiau absenoldeb staff ac anawsterau recriwtio wedi creu mwy o heriau. Ond er gwaethaf hyn mae'r pandemig hefyd wedi creu cyfleoedd a ffyrdd mwy arloesol o weithio er mwyn cynyddu ymgysylltiad gyda'r rhai a oedd yn arfer bod yn anoddach eu cyrraedd. Mae nifer y plant sy'n derbyn gofal yn parhau i fod ymysg yr isaf yng Nghymru, ac ar y cyfan mae'r canlyniadau a gyflawnwyd gan blant a rhai sy'n gadael gofal wedi aros yn gadarnhaol.

Pam mae'r Amcan Llesiant hwn yn bwysig

- Gan fod rhoi'r cychwyn gorau mewn bywyd i bob plentyn yn hanfodol er mwyn lleihau anghydraddoldebau yn ystod cwrs bywyd
- Mae ymyrraeth gynnar yn allweddol i iechyd a llesiant hirdymor. Mae'r hyn sy'n digwydd yn ystod y blynyddoedd cynnar hyn yn cael effaith gydol oes ar sawl agwedd ar iechyd a llesiant - o ordewdra, clefyd y galon ac iechyd meddwl i gyflawniad addysgol a statws economaidd
- Gan fod Plant sy'n Derbyn Gofal yn fwy tebygol o fod wedi bod yn agored i risgiau niferus sy'n gysylltiedig â chanlyniadau gwael yn y tymor hir cyn dechrau derbyn gofal.



Pa mor dda rydym yn ei wneud (a sut ydym yn gwybod)? ① Ffynonellau gwybodaeth



Mesurau Llwyddiant / Egluro'r Canlyniadau



Mae % y plant mewn gofal oedd wedi gorfod symud 3 gwaith neu fwy wedi gostwng i **6.6%**

O'r 167 o blant oedd yn derbyn gofal hyd at 31 Mawrth 2022, roedd 11 o blant wedi symud lleoliad 3 gwaith neu fwy. Mae hwn yn ganlyniad ychydig yn uwch na'r llynedd, sef 4.7% lle roedd 7 o'r 148 o blant oedd yn derbyn gofal wedi bod mewn 3 neu fwy o leoliadau. Roedd y plant oedd wedi symud wedi cael Profiadau Niweidiol yn ystod Plentynodod, yn llai sefydlog, ac yn meddu ar anghenion heriol a chymhleth. Roeddem wedi parhau i ganolbwyntio ar gynnal sefydlogrwydd lleoliadau gan gynnig cymorth lleoliad da ar draws y gwasanaeth i gyflawni hyn.

(Gweler Siart 1)



Rydym wedi parhau i weithio'n galed ar draws timau i gynnal sefydlogrwydd lleoliad, sydd dal yn rhagorol er gwaethaf effeithiau ychwanegol COVID-19. Rydym wedi llwyddo i gadw'r rhan fwyaf o blant sy'n derbyn gofal yn y sir ac yn yr un ysgol, sy'n bwysig wrth helpu i wella canlyniadau. Bu i saith o blant (allan o 105) newid ysgol yn ystod 2021/22. Gellir priodoli'r cynnydd yn y niferoedd o gymharu â'r llynedd (sef 3 allan o 96) yn rhannol i grwpiau o frodyr a chwiorydd sydd angen newid ysgol. Cynhelir sefydlogrwydd lle bynnag y bo'n bosibl, fodd bynnag nid yw hyn bob amser er budd y plentyn e.e. pellter i deithio neu anghenion academaidd plentyn ddim yn cael eu diwallu (**Gweler Siart 2**).

Ein nod yn y tymor hir yw atal yr angen i blant dderbyn gofal. Mae systemau cadarn ar waith i helpu i gyflawni hyn gan gynnwys Panel Llety a darparu gwasanaethau ataliol, gan ganolbwyntio ar gyfarfodydd rhwydwaith teuluol o ansawdd da. Mae ymyrraeth gynnar gan weithio mewn partneriaeth â theuluoedd trwy gynlluniau gofal a chymorth yn allweddol er mwyn cyflawni hyn.

Cynnydd rydym yn ei wneud ar y camau rydym yn eu cymryd i gyflawni'r Amcan Llesiant hwn

Cefnogi Teuluoedd

ARCHWILIO	DIOGELU - PLANT	GRADDAU Y SICRWYDD						
MEWNOL  Yn ystod y flwyddyn, edrychodd Archwilio Mewnol ar atgyfeiriadau Diogelu, er mwyn sicrhau y sefydlir polisïau a gweithdrefnau perthnasol a chydymffurfir â'r ddeddfwriaeth berthnasol. SYLW Cytunwyd ar gynllun gweithredu i fynd i'r afael â materion a nodwyd ac mae'r rhain yn cael eu monitro ar PIMS. Bydd adolygiad dilynol yn cael ei gynnal yn y flwyddyn cynllun archwilio nesaf.		<table border="1"> <tr> <td>UCHEL</td> <td></td> </tr> <tr> <td>DERBYNIOL</td> <td>✓</td> </tr> <tr> <td>ISEL</td> <td></td> </tr> </table>	UCHEL		DERBYNIOL	✓	ISEL	
UCHEL								
DERBYNIOL	✓							
ISEL								

- ⊙ Mae gwasanaethau plant wedi gweld cynnydd sylweddol yn y galw am wasanaethau a chefnogaeth gyda nifer y **cysylltiadau** â'r adran yn parhau i godi. Fodd bynnag, maent yn parhau i berfformio'n dda er gwaethaf y pwysau ychwanegol hyn.

Y Galw	2020-21	2021-22	Sylw
Cysylltiadau	7644	9625	Yn cynyddu
Atgyfeiriadau	1854	1754	Yn gostwng
Cyfanswm	9,498	11,379	Cynnydd cyffredinol

- ⊙ **Cwblhawyd 90.2% o'r asesiadau newydd o fewn yr amserlenni statudol.**
 - Mae tystiolaeth dda o hyd **mewn asesiadau o farn plant a sut beth yw bywyd iddyn nhw.**
 - Fel rhan o'r broses asesu, mae gweithwyr cymdeithasol yn siarad â'r ddau riant pa un ai ydynt yn gofalu am eu plentyn o ddydd i ddydd ai peidio.
 - Yn gynyddol, mae asesiadau'n cyfeirio at y cyfraniad y mae cyfarfod rhwydwaith teulu wedi'i wneud at yr asesiad o ran nodi ffynonellau cymorth ac wedi helpu i lunio cynllun diogelwch.
- ⊙ Mae'r ymagwedd seiliedig ar berthnasoldd at ddarparu gwasanaethau gwaith cymdeithasol i blant a theuluoedd, sy'n cynnwys meddwl systemig ac egwyddorion *Signs of Safety*, yn rhan greiddiol o'r holl dimau gofal plant gan gynnwys y tîm anabled 0-25. Mae cyfraniadau gan y Gwasanaethau Oedolion wedi cynnwys safbwyntiau gwahanol am deulu mewn trafodaethau pod a gweithredoedd a chynlluniau dilynol.
- ⊙ Rydym yn parhau i sicrhau bod trothwyon rhanbarthol yn gweithio'n effeithiol o ran trefniadau amddiffyn plant aml-asiantaethol, ac yn unol â pholisïau a gweithdrefnau y cytunwyd arnynt sydd wedi'u cynllunio i gadw plant yn ddiogel ac sydd wrth galon arferion a phenderfyniadau.
- ⊙ Drwy gydol pandemig COVID-19 mae pob plentyn agored i niwed wedi parhau i gael cymorth drwy'r timau gofal plant a'r tîm Rhianta Corfforaethol i sicrhau eu bod yn cael eu diogelu a'u bod yn gallu cyrraedd eu potensial. Mae'r canlyniadau ar gyfer plant sy'n derbyn gofal ac sy'n gadael gofal yn cael eu monitro'n rheolaidd hefyd.
- ⊙ Mae'r Ap Dechrau'n Deg wedi parhau i fod yn hollbwysig o ran cyrraedd teuluoedd, gan ddarparu negeseuon a chysylltiadau allweddol i wasanaethau cymorth a chefnogi ymgysylltu â theuluoedd, yn enwedig y rhai anoddach i'w cyrraedd. Rydym ni wedi cwrdd â Llywodraeth Cymru i werthuso llwyddiant yr Ap, yn enwedig yn ystod COVID-19, gyda'r nod o'i gyflwyno i awdurdodau lleol eraill fel arf i gyfathrebu ac ymgysylltu â theuluoedd.
- ! Bu i nifer y plant ar y gofrestr **amddiffyn plant** gynyddu'r llynedd - 102 (ar 31/3/22) o gymharu â 78.
- ! Mae nifer y plant sy'n **derbyn gofal hefyd wedi gweld cynnydd** eleni, 167 (ar 31/3/22) o gymharu â 148 yr un pryd y llynedd. Fodd bynnag, mae Sir Gaerfyrddin yn parhau i fod, yn gyfatebol, ymhlith y siroedd sydd â'r boblogaeth leiaf o Blant sy'n Derbyn Gofal yng Nghymru.

- ⊙ Mae'r dewis o **ofalwyr maeth** sydd ar gael yn rhywbeth rydym yn parhau i wneud cynnydd cyson arno. Rydym wedi recriwtio 12 o ofalwyr maeth newydd yn ystod 2021/22, sy'n welliant oherwydd yn flaenorol roedd y pandemig wedi effeithio ar recriwtio.
- ⊙ Rydym wedi parhau i ddatblygu ein gwasanaethau ar gyfer **plant anabl rhwng 0 a 25** oed ers gweithredu'r strwythur newydd yn ystod 2020/21, gan ddod â'n timau statudol ac anstatudol i blant a phobl ifanc at ei gilydd.

Canfyddiadau Rheoleiddio Allanol

 ADRODDIAD RHEOLEIDDIO Arolygiaeth Gofal Cymru Care Inspectorate Wales	Ym mis Tachwedd 2021, cyhoeddodd Arolygiaeth Gofal Cymru (AGC) ei lythyr Gwiriad Sicrwydd 2021 ar Gyngor Sir Caerfyrddin I grynhoi: Sicrwydd Gofal Cymdeithasol i Blant • Arweinwyr agos-atoch a chefnogol • Diwylliant o gyd-gynhyrchu a chanlyniadau personol yn cael eu datblygu gyda phobl • Eglurder mewn methodoleg weithredol • Cydweithrediad aml-asiantaeth cryf • Ymagwedd integredig gadarnhaol at ddiwylliant o atal drwy gydweithio • Poblogaeth fach o blant sy'n derbyn gofal • Gwneud cyfraniad cadarnhaol at lesiant pobl yng nghyfnod y pandemig
--	--

Anghenion Dysgu Ychwanegol

- ⊙ Mae'r Cyngor yn parhau i gefnogi rhaglen Trawsnewid Anghenion Dysgu Ychwanegol Llywodraeth Cymru drwy gefnogi ysgolion ac ystod amrywiol o randdeiliaid i weithredu'r holl gynlluniau trawsnewid ag amserlen barhaus o waith sy'n cael ei adolygu a'i ddiweddarau'n rheolaidd er mwyn cael diweddariadau gan Lywodraeth Cymru.

Y SYSTEM ANGHENION DYSGU YCHWANEGOL NEWYDD

Mae'r system ar gyfer cefnogi plant a phobl ifanc ag anghenion addysgol arbennig ac anabledd yng Nghymru yn newid.

Ers mis Medi 2021, mae Llywodraeth Cymru wedi cyflwyno system newydd fwy hyblyg ac ymatebol ar gyfer diwallu anghenion plant a phobl ifanc ag anghenion addysgol arbennig neu anableddau ac mae'n ymdrechu i gyflwyno system addysg gwbl gynhwysol ar gyfer dysgwyr Cymru.

Mae'r newidiadau allweddol yn cynnwys:

- Bydd y term Anghenion Dysgu Ychwanegol (ADY) yn disodli'r termau Anghenion Addysgol Arbennig (AAA) ac Anawsterau ac Anableddau Dysgu (AAD).
- Mae'r system raddedig bresennol o Weithredu gan y Blynyddoedd Cynnar/Ysgol, Gweithredu gan y Blynyddoedd Cynnar/Ysgol a Mwy a Datganiadau yn cael ei disodli. Bydd pob plentyn a pherson ifanc sydd ag angen dysgu ychwanegol (ADY) a nodwyd sy'n gofyn am ddarpariaeth ddysgu ychwanegol yn cael Cynllun Datblygu Unigol (CDU) a fydd yn cymryd lle'r holl gynlluniau unigol eraill.
- Bydd mwy o gyfleoedd i blant, pobl ifanc, rhieni a gofalwyr gyfrannu at greu a chynnal Cynlluniau Datblygu Unigol trwy gyfrwng Cynllunio sy'n Canolbwyntio ar yr Unigolyn.

ASTUDIAETH ACHOS

Y broses o dderbyn plant i'r ysgol:

Mae Dysgwr A ar hyn o bryd yn ddisgybl cyfnod sylfaen sy'n mynychu ysgol gynradd brif ffrwd yn Sir Gaerfyrddin. Cyn cychwyn yn yr ysgol, roedd angen pecyn pontio wedi'i gynllunio'n ofalus oherwydd anghenion corfforol a symudedd sylweddol a difrifol.

Roedd Dysgwr A yn mynychu Ysgol Feithrin leol cynt. Roedd hi'n amlwg bod Dysgwr A wedi setlo, yn gwneud cynnydd, ac yn mwynhau ei amser yno'n fawr. Daeth Dysgwr A yn adnabyddus i'r Adran Cynhwysiant drwy'r system Mynediad i Addysg lle nodwyd bod angen am broses bontio oedd wedi'i chynllunio'n ofalus. Trefnwyd cyfarfod cynllunio sy'n canolbwyntio ar yr unigolyn, lle roedd gwasanaethau roedd y teulu'n gwybod amdanynt yn gweithio mewn partneriaeth â'r teulu i gynllunio ar gyfer pontio, gan gynnwys cynrychiolaeth o'r Ysgol Feithrin, yr ysgol gynradd, cydweithwyr ieuchyd arbenigol, a thîm cynhwysiant yr awdurdod lleol. Rhannwyd gwybodaeth allweddol gyda'r holl gyfranogwyr a thrafodwyd yr achos gan ddefnyddio proses gwneud penderfyniadau glir, gyda Dysgwr A yn ganolog i bob trafodaeth a phenderfyniad. Daeth i'r amlwg bod Dysgwr A yn blentyn ifanc cymdeithasol, hyderus a phenderfynol a fyddai'n ffynnu o fewn lleoliad cynradd prif ffrwd, er gyda'r lefel gywir o gefnogaeth i sicrhau ei diogelwch a phontio llwyddiannus oherwydd ei hanghenion ychwanegol cymhleth. Yn dilyn y cyfarfod cynllunio sy'n canolbwyntio ar yr unigolyn, casglwyd barn yr holl fynychwyr mewn Cynllun Datblygu Unigol (CDU) a oedd yn cynnwys y canlyniadau penodol a chyraeddadwy ar gyfer Dysgwr A, ynghyd â'r lefel arfaethedig o ddarpariaeth. Yna, bu i Banel Cynhwysiant Sir Gaerfyrddin ystyried y Cynllun Datblygu Unigol a chytuno i gyflwyno a sicrhau'r ddarpariaeth arfaethedig. Cyn hir, gwnaed addasiadau i'r adeilad yn barod ar gyfer pontio.

Cynnydd yn yr ysgol? Beth maent wedi'i gyflawni?

Bu i Dysgwr A bontio'n dda i'r ysgol. Mae'r cynnydd yn amlwg gan fod Dysgwr A yn teimlo ei fod wedi'i gynnwys, mae pob rhwystr wedi'i waredu, ac mae'n gallu cael mynediad at yr holl ddysgu. Anogir annibyniaeth pryd bynnag y bo modd a defnyddir cefnogaeth benodol, yn ôl yr angen. Er gwaethaf anghenion corfforol a symudedd cymhleth, mae Dysgwr A wedi pontio i amgylchedd prif ffrwd prysur gyda'i chyfoedion lle mae'n hapus, wedi setlo ac yn gwneud cynnydd. Nid yw'n teimlo'n wahanol i bawb o'i chwmpas diolch i bontio a gynlluniwyd yn ofalus a gweithredu darpariaeth gynhwysol addas - a ddatblygwyd ac a gytunwyd mewn partneriaeth â phawb sy'n adnabod y dysgwr orau.

Sut roedd pawb a gymerodd ran, yn deulu ac yn weithwyr proffesiynol, yn teimlo am y broses?

Roedd pob un yn hynod gadarnhaol am y broses. Proses newydd i bawb gyda nifer yn gwneud sylwadau ar fanteision llai o fiwrocratiaeth. Pob un â'r grym i gael llais cyfartal yn y trafodaethau pwrpasol a'r cynllunio o gwmpas y dysgwr. Roedden nhw'n teimlo bod amser wedi'i dreulio'n ddoeth, a bod llai o rwystrau i'w goresgyn. Pwrpasol, effeithlon, ac effeithiol.

Y Ddarpariaeth Anhwylder Sbectrwm Awtistig

Ar hyn o bryd, mae gan yr Adran Addysg a Phlant (blwyddyn academiaidd 21/22) y lleoedd canlynol ar draws y sir er mwyn hwyluso darpariaeth arbenigol i ddisgyblion ag Awtistiaeth:

- Cynradd - 64
- Uwchradd - 84

! Ers Medi 2021, bu cynnydd sylweddol yn y galw am ddarpariaeth Anhwylder Sbectrwm Awtistig, ac yn ystod blwyddyn academiaidd 2021/22 roedd diffyg o 30 o leoedd, sydd 20% yn fwy na'r capasiti.

Yn ystod y misoedd diwethaf mae'r adran wedi gweld cynnydd sylweddol yn y galw am leoedd Anhwylder Sbectrwm Awtistig arbenigol am flwyddyn academiaidd 2022/23, ac mae'r sefyllfa a ragwelir ar gyfer Medi 2022 fel a ganlyn:

- Cynradd – Nifer y lleoedd sydd ei angen / sydd ar gael - 20
- Uwchradd - Nifer y lleoedd sydd ei angen / sydd ar gael - 10

Bydd diffyg parhaus hefyd ar gyfer blwyddyn academiaidd 23/24, a hynny o 26 o leodedd o leiaf fel y mae ar hyn o bryd, nad yw'n ystyried disgyblion sy'n dod i mewn a disgyblion prif ffrwd sydd ag anghenion a nodwyd dros flwyddyn academiaidd 22-23.

Mae'r cynnydd sylweddol yn y galw o ganlyniad i:

- Mewnlfriad – teuluoedd yn symud i Sir Gaerfyrddin
- Cynnydd sylweddol yn nifer y disgyblion sy'n cael diagnosis o anghenion ychwanegol/diagnosis Anhwylder Sbectwm Awtistig meddygol sy'n cael ei gydnabod fel tuedd genedlaethol. Mae'r Bwrdd Iechyd wedi cynyddu capasiti'r tîm niwroddatblygiadol i brosesu'r ôl-groniad o atgyfeiriadau ASD, gan arwain at gynydd mewn diagnosis ASD. Dros y 3 blynedd diwethaf mae hyn wedi gweld dros 100 o blant yn Sir Gaerfyrddin â diagnosis ASD yn ein hysgolion.
- Capasiti'r ysgol - twf ym mhoblogaeth ysgolion lleol/addasrwydd adeiladau
- Covid yn amharu ar brosesau adnabod cynnar sefydledig
- Prosesau adnabod cynnar wedi'u hailsefydlu

Mae gan yr Awdurdod Lleol rwymedigaeth gyfreithiol i wneud darpariaeth ar gyfer y disgyblion hyn erbyn Medi 2022 a gallent wynebu her gyfreithiol gostus sydd â'r potensial i gostio hyd at £30,000 mewn ffioedd cyfreithiol fesul achos. Os na chaiff angen ei ddiwallu'n lleol gallai hyn arwain at rwymedigaeth gyfreithiol i sicrhau lleoliadau annibynnol drud tu allan i'r sir sy'n costio dros £150,000 am flwyddyn benodol.

Mae rhieni eisoes wedi rhoi gwybod i'r Adran os na chaiff darpariaeth arbenigol ei darparu, byddant yn cymryd camau cyfreithiol trwy'r prosesau apeliadau AAA.

- ⊙ Wrth edrych tua'r dyfodol rydym wedi cael ein dewis fel awdurdod “braenaru” gan Lywodraeth Cymru er mwyn datblygu gwell integreiddiad ar draws gofal plant, iechyd ac addysg blynnyddoedd cynnar.

Darpariaeth gofal plant

- ⊙ Mae [Asesiad Digonolrwydd Gofal Plant Sir Gâr 2022-27](#) wedi'i ddrafftio'n ddiweddar ac wedi cael ei anfon ymlaen at Lywodraeth Cymru. Mae'n rhoi trosolwg ar y farchnad gofal plant ac effaith COVID-19. Fe wnaethon ni ymgynghori'n helaeth ac roedd y cyfraddau ymateb yn eithriadol. Dyma rai casgliadau allweddol:-
 - Ers ein Hasesiad Digonolrwydd Gofal Plant llawn diwethaf (2017-2022), mae nifer y lleoedd a'r darparwyr gofal plant wedi cynyddu ac wedi aros yn weddol sefydlog er gwaethaf heriau pandemig COVID-19.
 - Mae nifer o warchodwyr plant wedi dadgofrestru ers ein Hasesiad diwethaf a bydd angen i ni recriwtio, hyfforddi a chefnogi darpar warchodwyr plant i lenwi'r bylchau hyn.
 - Mae fforddiadwyedd gofal plant i'r teuluoedd hynny na allant gael gofal plant a ariennir yn parhau i fod yn broblem sylweddol.
 - Mae gofal plant yn rhwystr i gyflogadwyedd rhai rhieni, ac nid yw'n ddigonol ar gyfer anghenion rhai o'r rhieni hyn
 - Mae ymestyn y Cynnig Gofal Plant i blant 3 a 4 oed (y cynnig 30 awr o ofal plant am ddim) yn awgrymu bod disgwyl bydd mwy o alw am ofal plant sydd wedi cofrestru'n rhan-amser.
- ⊙ Mae bron i draean o blant yn byw mewn tlodi. **Gweler Amcan Llesiant 4**

Oes unrhyw un ar ei ennill?



GORFFENNAF I FEDI 2021



HYDREF '21 TAN FAWRTH '22

Rhoddodd Llywodraeth Cymru £270,00 i Sir Gaerfyrddin tuag at Haf o Hwyl a £434,689 tuag at Gaeaf Llawn Lles i gefnogi plant a theuluoedd fel rhan o'u hadferiad yn dilyn y pandemig a'i gyfyngiadau, ac i sicrhau nad oedd yr un teulu na phlentyn yn cael ei adael ar ôl oherwydd y pandemig. Mae tua 15,000 o blant a phobl ifanc wedi elwa o'r gweithgareddau hyn ar draws y sir o 0-25 oed. Darparwyd pecyn sylweddol o gefnogaeth i ariannu mentrau sydd wedi'u cynllunio i helpu plant, pobl ifanc, teuluoedd, a'r gwasanaethau maen nhw'n eu defnyddio i adfer a symud ymlaen. Roedd sawl sefydliad a gwasanaeth yn Sir Gaerfyrddin wedi derbyn arian. Roedd y rhain yn cynnwys Canolfannau Teulu, Canolfannau Plant, y Gwasanaeth Ieuenctid, Menter, Urdd, Actif, Parc Gwledig Pen-bre a theatrau lle gallai plant a phobl ifanc gymryd rhan mewn gweithgareddau rhad ac am ddim a gynlluniwyd i gael effaith gadarnhaol ar eu llesiant. Roedd rhai o'r gweithgareddau'n cynnwys clybiau gwyliau, sesiynau nofio, beicio mynydd, gwersi marchogaeth, sesiynau chwarae meddal, dosbarthiadau coginio, grwpiau tylino babanod a gweithgareddau chwarae awyr agored mewn ardaloedd gwledig. Roedd y gweithdai'n cynnwys cerddoriaeth, ysgrifennu a datblygu podlediad, ynghyd â theithiau i Fferm Folly, chwarae meddal, parc trampolinau, yr ardd fotaneg, ac ymweliadau i weld Siôn Corn a sioeau Nadolig.

Crëwyd blychau llesiant a gweithgareddau a phrynwyd amryw o offer synhwyrdd a TG o'r radd flaenaf sy'n dal i gael effaith gadarnhaol ar blant a phobl ifanc.

Dywedodd rhai o'r rhieni a'r plant wnaeth elwa ar y rhaglen:

"Jyst gweld fy mhlentyn i'n mwynhau ei hun, ac o'n i'n mwynhau bod gyda rhieni eraill"

"Roedd yn anhygoel - Diolch. Roedd dim ond gweld rhieni eraill a chymdeithasu mor dda i fy ieuchyd meddwl."

"Mae mor cŵl cael chwarae beth dwi eisiau"

"Allwn ni ddod yma bob dydd?"



Beth a sut gallwn ni wneud yn well

Ein cynllun gweithredu i gyflawni'r amcan hwn

Cyf	Camau Gweithredu a Mesurau	Dyddiad/ Targed	Perchennog/ Swyddog Cyfrifol
A	Cefnogi Teuluoedd		
1	Byddwn yn parhau i drawsnewid arferion gwaith cymdeithasol plant drwy ymagwedd seiliedig ar berthnasoedd sy'n cynnwys meddylfryd systemig ac egwyddorion <i>Signs of Safety</i> . (PIMS cyf. 15351)	Mawrth 2023	John Fleming
2	Byddwn yn parhau i oruchwyllo a herio Asesiadau a Chynlluniau Gofal a Chymorth yn effeithiol i sicrhau eu bod yn canolbwyntio ar ganlyniadau, yn dangos tystiolaeth o lais y plentyn, ac yn adlewyrchu egwyddorion sylfaenol y Ddeddf Gwasanaethau Cymdeithasol a Llesiant. (15352)	Mawrth 2023	John Fleming
3	Byddwn yn adolygu ac yn monitro gweithrediad y Strategaeth Rhianta Corfforaethol , gan sicrhau bod y Cyngor yn cyflawni ei rôl Rhianta Corfforaethol a bod ein plant sy'n derbyn gofal a'r rhai sy'n gadael gofal yn cael cyfle i wireddu eu potensial llawn. (15368)	Mawrth 2023	Rebecca Robertshaw
4	Byddwn yn parhau i ddatblygu a chyflwyno'r gwasanaethau cymorth ymyrraeth gynnar (0-25) ar gyfer plant difreintiedig, pobl ifanc, a theuluoedd ledled y sir yn unol â'r Strategaeth Cymorth i Deuluoedd, gan ddefnyddio cyfleoedd i integreiddio gwasanaethau ar draws y Grant Plant a Chymunedau a chyfleoedd ariannu hyblyg gyda'r Grant Cymorth Tai. (15356)	Mawrth 2023	Noeline Thomas
5	Byddwn yn cadw i ganolbwyntio ar gynyddu'r ystod o leoliadau i sicrhau sefydlogrwydd o ran lleoliadau a sefydlogrwydd mewn addysg mewn perthynas â phlant sy'n derbyn gofal, gan gynnwys llety drwy weithredu gwasanaeth llety mewnol a gynhelir. (15375)	Mawrth 2023	Jayne Meredith
6	Byddwn yn parhau i geisio lleihau nifer y plant sy'n dechrau Derbyn Gofal a nifer yr achosion gofal yn unol â'n targed lleihau plant sy'n Derbyn Gofal, fel y cytunwyd arno gyda Llywodraeth Cymru, gan ddefnyddio'n briodol Ar Ffiniau Gofal, y Tîm Integredig Cymorth i Deuluoedd a'r Tîm Ymyrraeth i Deuluoedd. (15364)	Mawrth 2023	Jayne Meredith
B	Anghenion Dysgu Ychwanegol		
1	Byddwn yn parhau i sicrhau bod y Cyngor yn ymateb yn llawn i ofynion rhaglen drawsnewid yr Anghenion Dysgu Ychwanegol ac yn cydymffurfio'n llwyr â nhw. (15453)	Mawrth 2023	Rebecca Williams
2	Byddwn yn parhau i gefnogi ysgolion i ddatblygu eu hymagweddau cynllunio sy'n canolbwyntio ar unigolion i nodi angen, cyflawni darpariaeth dysgu ychwanegol bersonol a darparu ymatebion integredig cyfannol drwy waith amlasiantaeth. (i'w gadarnhau)	Mawrth 2023	Rebecca Williams
C	Darpariaeth gofal plant		
1	Byddwn yn gweithio tuag at fynd i'r afael â'r bylchau a nodwyd yn ein pumed Asesiad Digonolrwydd Gofal Plant (2022-27) a'r Cynllun Gweithredu cysylltiedig, ac rydym yn parhau i hyrwyddo a datblygu gofal plant cyfrwng Cymraeg ymhellach o fewn y sir. Byddwn yn cefnogi'r sector gofal plant i adfer wedi'r Pandemig ac i barhau i fod yn gynaliadwy. (15357)	Mawrth 2023	Noeline Thomas
2	Byddwn yn rhannu canfyddiadau'r Asesiad Digonolrwydd Cyfleoedd Chwarae newydd (2022-27) gyda rhanddeiliaid a phartneriaid allweddol ac yn cytuno ac yn rhoi ar waith Gynllun Gweithredu 2022/2023, i fynd i'r afael â'r bylchau a nodwyd er mwyn sicrhau bod plant a phobl ifanc lleol yn gallu cael mynediad at gyfleoedd a phrofiadau chwarae eang ac amrywiol. (15359)	Mawrth 2023	Noeline Thomas



Cliciwch [yma i gael gweld ein cynnydd manwl ar gyfer ymrwymadau a thargedau](#) o ran yr amcan hwn am 2021/22.